

天真閣集

天真閣集卷十七

詩十七

昭文 孫原湘 子瀟

旃蒙赤奮若

胥江與仲瞿諧別

一鞭同出九華門不分春明卷復溫
逃學兒童重上學離婚老女再求婚
驢灰五色心知味鴻雪三秋爪有痕
珍重萬年橋下別靈巖山影也消魂

家補雲孝廉

晉瀟

楓江送別圖

一聲風笛思縱橫把酒看山酒罷行
出處吾曹關氣運文章從古借科名
野梅落月連宵夢官柳如雲夾道迎
回首楓江千尺水此中何限故園情

舟至丹陽水淺不得進同子儁作

千檣萬舫太紛紜兩岸青山又夕曛一枕且安鷗鷺夢四圍誰
領鸛鵝軍人閒去住風行水天下英雄我與君會看桃花春浪
煥片帆飛破大江雲

題高旻寺塔憶數歲時過此閱三十六載復尋舊游

綠楊幾樹綰行舟重叩招提認舊遊絕頂風雲通帝座下方烟
月瞰揚州何郎詩句空千古杜老登臨反百憂三十六年鴻迹
在諸天招手喚閒鷗

淮南道中

日落清淮水亂流桂林何處小山幽神仙只要黃金鑄雞犬都
看碧落遊手版橫腰天女笑牙門拒客八公愁何時璧社湖中
月飛上清光照九州

泰安道中

歷碌車聲殷怒雷參差亂石怪雲堆女媧無力墜於此秦政有鞭驅不開骨散思教菩薩鎖頭低難學丈夫擡僕夫路熟身輕慣蹶蹶惟嫌馬不材

雨行和子侶韻

雨洗沙明雪走溪溼雲橫斷路東西蒙頭且作車中婦枵腹偏聞午後雞石碾雙輪磨日月山分兩界畫燕齊上林此去花如繡歸夢休聽杜宇啼

寓齋海棠盛開花下同子和

記得君家開北堂紅情爛漫鬪春光何期烏帽黃塵底重睹紅紗翠褱妝好景每教思往事名花偏值在他鄉故園如此芳菲節扶杖何人看夕陽

白丁香

憑闌一樹月朦朧看似梨花卻不同不信胭脂空北地可憐冰
雪耐東風塵邊心迹難移素老去春情欲洗紅我有閒愁千百
結那堪相對客窗中

宋宮團扇歌

上鈐鳳閣之寶玉璽左有紹興小印右偏有安麓邨
印麓邨賈似道門客也繪田家景物絕工逼真宋畫
苑中筆當是高廟時御用之物後以賜賈遂爲其門
下所得絹質堅厚歷千餘年如新惟色稍殷耳子和
以四金得之廐市邀予作歌

團扇流傳宋時久翦雪裁霜絹不朽秋風冷落一千年明月依
然落人手可憐扇作月輪圓不比金甌闕半邊輸罷歲繪三十
萬零紈賸綺尙鮮妍水田幾稜清溪繞誰寫南朝風景好翦取

杭州作汴州西湖自大朝廷小君王避暑幸離宮玉柄輕搖水
殿風不知羽蓋雪屏下何似冰天雪窖中咸淳宰相尤兒戲內
家法物何年賜輕襲偏教狎客攜玉璽猶鈐紹興字一戰荆襄
百事灰半閒堂上月徘徊涼風未報秋蟲死冷露先驚白雁來
南渡風流賸如此中邊猶拓澄心紙可惜如珪有玷存麓邨一
印難湔洗我朝仁風被八埏不求古物惟求賢寧教零落波
斯市敢逐南薰進御筵

謝薌泉侍御

振定

楊蓉裳農部張船山檢討潘紅茶編

脩恭辰

蔡浣霞儀曹

鑾揚

約同志四十人於三月十

八日陶然亭燕集予以風雨不克與因成兩詩報謝
竝簡座中諸君子

風雨雞鳴感索居六街泥滑水成渠盟鷗儘許忘年契走馬空

傳隔日書客數公榮宜不飲人疑方朔出無車平生幾兩游春
屐已是花間一度虛

烟樹亭林悵淼漫諸公高會捧珠盤道關風雅天應忌人判雲
泥合本難曲醺定傳爲故事後期誰續此清歡西窗一硯梨花
雨翦燭題詩只自看

法時帆祭酒席上展開瀛洲亭圖輒題其後

一帆飛渡到蓬萊從此仙凡始脫胎百六十年科目在幾人不
負此中來

書查初白中山尼詩後

詩爲先生遊黔時作所指似宋荔裳女翁單溪侍郎
據北平王景曾宋公墓志及公行畧證其非是其言
曰漁洋集中有不得荔裳妻孥消息詩在康熙十九

年庚申之春而荔裳歿於京師在十三年甲寅墓志云公北上時眷屬數十口滯蜀瀕死者屢矣卒獲歸無一散失者蓋在公歿八年之後而漁洋作詩時未之知也初白此詩作於二十一年壬戌是時宋公眷屬已歸矣又據行畧云女一適廩生王成命與初白所敘似不相應慮其流傳既久爲荔裳身後一恨事故詳攷其實而具著之余細玩詩意初白蓋寄慨於六詔班師情事非專詠中山尼尼之爲宋女與否固不足辨而覃溪兢兢考論要不失風人忠厚之旨予故兩是之爲作是詩

作詩良復難讀詩亦不易悔翁昔詠中山尼此事分明爲誰記首爲著閨閼次及女生平中間敘喪亂世事方縱橫貴家巨室

且如此高官不庇一女子勿論是宋女勿論是萊陽但聞滿紙
悲啼聲天荆地棘皆鉤傷翁目擊此情事下筆撰述殊蒼黃
當時不識宋荔裳寧不一證王漁洋覃溪老人真好事博采旁
徵畧與志莫言海印真爲尼特表羅敷自有壻蔡女飄零何足
問九原欲釋中郎恨但得詩人忠厚心便翻前案皆名論此詩
本記滇池平詞旨可惜難分明何不一唱班師行

春榜放後作

泥金帖子耀春屏注定文昌第二星

省試會試俱列第二

泰岱未嫌居次

嶽惠泉何必望中冷事傳天上誇仙詠

上諭廷臣今歲進呈十卷文理俱勝

名

愧人間算佛經獨對東風轉惆悵舊袍遲換十年青

禮部飲宴歸作家書寄內

陌上年年盼兩眸今番應得放眉頭無由割肉誇聞喜且免抽

豪賦遣愁噉餅尙勝牙雪脆看花敢逞眼風流寄君一語君應
笑竝未醉眠何處樓

四月廿一日對策 保和殿恭紀

觚稜高捧日瞳眬黃紙宣題出 禁中一字動關天下計萬言
誰得古人風危辭祇恐劉蕡驟流涕寧忘賈誼忠十載讀書先
養氣敢將憤激進

堯聰

廿七日

恩賜白金表裏恭紀

金繒捧出五雲邊小草欣霑雨露鮮 頒賞非由交趾賂度支
纔判水衡錢銘鐘事業期他日補袞勳名愧昔賢楊震算金胡
質絹矢將清節 玉墀前

五月二日 勤政殿引 見館選恭紀

禁門曉樹排 仙仗 秘殿薰風拜

聖人未敢舉頭瞻日月已同躡屐上星辰身霑 玉座香烟近
名荷

丹豪點注新愧乏上林能賦手便令簪筆號詞臣

十五日翰林院宣 旨臣 原湘 名在第十九

黃紙宣除下 紫宸瀛洲

恩許躍凡鱗三千水弱迢迢路十九名低碌碌人學士畫圖添
不得院廳杯酌例堪循只愁花涸江郎筆依樣壺盧倣未真唐張
說院廳燕會謂諸學士曰聞高宗朝脩史有十九人時長
孫太尉以元舅之尊不肯先飲乃取十九杯一時舉飲

自題畫梅

自是瑤臺第一籌香清骨瘦太風流任他花史閒評泊紅紫紛

紛壓上頭

耐盡霜欺又雪摧
不曾借力煥風開
誰從玉性瑤情裏
寫出稜稜鐵骨來

送李明府

書吉

出宰粵東

李侯意氣本縱橫
六月炎暉匹馬征
爲宰十年將白髮
長官百里蒼生雲
橫銅柱連烽影
月冷珠江墮雁聲
君去種花先薙
莠好憑籌筆報昇平

對牀明月對銜杯
忽漫驪歌馬上催
五瑞慢誇高固像
一琴先上趙佗臺
海疆浪息鯨鯢徙
蠻俗風清蚌蛤回
莫寄荔枝三百
顆年年祇盼尺書來

送族姪

星衛

之粵東

我來自初春
汝來自初夏
握手道平生
聯牀共清夜
事我頗敬

天眞閣集卷十七
恭年紀實相亞同枝本情親孤懷况旅舍晨興告我別遽命粵
東駕邁此長夏炎如何短轅跨迢迢五羊城風霍正驚怕京洛
苦緇塵旅食太閒暇蠻鄉紛瘴雨輕身此遊乍依人計可憐欲
罷豈得罷

汝來自初夏我來自初春丹榴既開落又見芙蓉新遽愴離別
懷萬里誰相親得官豈足飽爲客寧救貧昨來故鄉書大水連
畦畛斗米六百錢兩家甑生塵墟落久烟斷途有強食人汝游
頗孟浪我歸亦逡巡我親年七袞汝親年八旬努力念春暉各
保遊子身

得瞿生

紹堅 還鄉消息卻寄

一紙瑤書寄遠天江湖歸夢已翛然偶通鳥語原非罪被詆蛾
眉越可憐人世無如將母樂龍門儘許著書傳季鷹早有莼鱸

興只等秋風下水船

聽鵬圖

綠陰選得最高枝偷眼看人側耳時寫出聽翁真意趣詩人聽鳥鳥聽詩

婉語閒關自轉清隔重花葉倍分明人間多少箏琶耳別有池塘鼓吹聲

戲題瞿菊亭孝廉紫雲迴樂府

撲朔迷離久亂真還他本色轉翻新特爲菊部開生面卻遣梨園自見身叔寶羊車香入市鄂君翠被煥生春憐君脫盡陳窠臼纔有當場動目人

菊亭自題落卷云慙無牛鬼蛇神筆那得當場動目來戲用其語

桃笙二十四韻擬韓孟聯句體

美箭不成笛巧匠編作笙土貢致楚產方言辨吳儋左思賦親

寫韓愈背願傾絕勝象牙製頗混鳳管名裁量竹榻稱打疊筠
筒盛未開撲涼爽傳看誇纖輕脛殊黃琉璃滑訝綠水晶滿眼
無瑕疵通體惟澄泓纖皮溷雨漬細辨凝霜并龍鱗氣慘慄蛇
腹紋纏縈在冷安見長當暑方施行四角體端正萬條理分明
埽除奴子喜光彩兒童驚春花隱可按秋水鋪乍平觸手滑不
留倒身眠已成如浮湘波上疑聽風漪聲體貼愈可愛轉側俱
有情得此颯爽力反恐炎曦更洗滌本自勤塵垢何處生八尺
碧天淨一方青玉瑩小兒膚細膩高人節堅貞蝨蝨自遠避蚊
蠅敢爭營卷舒可小大展布任縱橫願陳 廟堂上長奉
皇居清

金蓮花

五層臺見五層霞臺上重臺發異葩直是布金成世界非關祝

鉢涌蓮華仙人一掌承清露學士雙燈撒絳紗自奉
宸游歡賞後赭袍分染

玉皇家

雜憶寄內

賣冰聲過小胡同隔院燕脂返照紅我是五湖鷗鷺長自溫清
夢水雲中

鄉書遙憶路漫漫幽閑聊憑鵲語寬今夜合歡花底月小庭兒
女語長安

隔牆笑語送燕姬卻憶妝臺坐對時手熟鷓鴣香吟字母齒音清
脛帶京師

觀音齋過罷燒香白小登盤潔似霜忽聽輕雷塘外起食單新
忌報廚孃

如星黃月暗房櫳怕上銀鐙一點紅小朵鬢華香沁骨謝孃頭
上過來風

年時相約拜雙星小扇輕衫倚畫屏嬌女唐詩新上口夜涼先
背阿孃聽

料應銷字付瑤梭摺向雕窗一月多半角銀灣雲抹斷夜明簾
底注橫波

秦家風調竇家情苦爲離鄉太瘦生閒坐玉堂歸不得悔教風
引到蓬瀛

洗硯圖爲子和作

紫雲一片簇龍鱗日喚奴星滌濯頻守黑漫誇如老子洗心纔
顯是端人雪溪可變宜休沐墨海能澄見性真安坐西曹書判
罷冰襟與爾共無塵

六月廿四日梧門祭酒招同謝薌泉侍御楊蓉裳農部

鮑覺生宮允

桂星

吳蘭雪博士

嵩梁

徐星伯庶常

松

遊積水潭觀荷放歌示蘭雪

瀾瀾渺渺水似天搖搖曳曳車似船蕭蕭騷騷葉似雨隱隱約約
花似烟我來長安揮玉鞭看花只解春風顛黃塵滿眼苦不
耐逕思歸去滄江眠昨宵夢乘一葉蓮吹簫濯髮爲飛仙醒來
先生恰招我驅我故鄉烟水置眼前白鷗飛飛宛如夢中識只
少花外幾曲菱歌傳清風吹人沁肌膚碧天有界香無邊我非
逃暑暑逃我白日如月當秋縣安得一船橫盪花四壁臥看花
神弄月如珠圓坐中吳郎色自喜踏月看花幾度矣不知是月
還是花一片空明色香裏三更四更爲花起五更蒼茫月墮水
滿天風露不肯歸願抱清香爲花死吳郎有此真性情宜爾詩

思徹骨清偶然落筆欲仙去紙上拂拂花香生蓮花博士稱爾
名意氣兀傲凌公卿鑑湖賀老薦不得頭顱照水愁雪明吳郎
對我笑拍手那知此事且飲酒但須種蓮滿湖酒滿甌與爾同
輕萬戶侯

平叔弟

爾準

邀遊尺五莊小飲

畧帶江南意詩情便爾生野花脩近水小雨勝初晴客久始知
趣歸遲猶嬾行新涼且深酌六月有秋聲

獨坐

獨坐偶不適時還思誤書人情隨物變天影共心虛無累須奇
福能閒卽隱居青天雷隱隱多少貴官車

寓齋卽事

小庭疊石仿煙嵐人海幽深古佛龕一雨苔花青亂灑年來風

氣似江南

溼天涼影弄晴霞畫出清秋景物嘉
刪卻半庭書帶草小紅粧
茁數叢花

有寄

歸期原約海榴開辜負菖蒲泛酒杯
京洛一官如客繫故人千里少書來
閨房最妬明誠福弟子終慙逸少才
料得水晶宮裏事玉臺雙笑謔金臺

送子和比部扈蹕奉天

人生何事最快意貴後重經舊遊地
況在勾陳豹尾間山川雲物皆新氣
君昔東出山海關相如作賦詞斑斕
先皇駕幸舊豐沛稽首拜獻瞻

龍顏回顧從官愼遴選煌煌文綺中
官頒是時先君治郡事喜

覩快婿蒙

恩還一時賓從盡相賀絕勝滕王閣賦誇子安二十八年事如昔當時少年今髮白羨君簪筆登玉堂復入畫省爲曹郎去年賓興慎主試君奏 寶殿詞鏗鏘

天子曰咨汝臣燮汝持玉尺衡豫章歸來奏對尤稱 旨聲名奕奕垂巖廊今年

龍飛正十載上

陵盛典遵

先皇百官羽林悉陪從君以秋憲參班行遼東父老扶杖來昔時書生何壯哉重登遼海亭再上僊人臺千年老霍舊相識亦復盤空轉喉而徘徊若過清風司馬署尙應認得題詩處雪泥鴻爪豈偶然至今粉壁紗籠護驂驪 屬車定有詩一洗寒痠

書生辭采風尚及州官政掇取羊公峴首碑

吳兼山參軍來都謁選出示見懷之什次韻奉酬

百年何苦盼署金我愧名山入未深
一品官場同傀儡九遷宦海總浮沈
吏堪充隱除仙尉貴可爲郎賦上林
手版足韉京洛道詩人未了濟時心

九鐵僧寮與兼山秋語

纓絲衰竹近中年過眼春痕水上烟
一窖黃金新鑄佛半牀青史小游仙
引人入夢偏胡蝶勸客歸田有蜀鵲
暢好尙湖秋萬頃幾時同上釣魚船

驅卻青蠅百事宜石幢松影下梁恩
客磨詩裏花同瘦秋到人閒佛不知
萬葉盛衰先有信一蟬哀怨總無私
紅塵白社雙青眼如此相看得幾時

再過九鐵僧寮拈前韻

秋光如此送流年舊夢零星拾墜烟無藥可醫天下俗有金難
買地行仙冷官暫住同秋燕歧路思歸託杜鵑身到蓬山成一
笑幾曾真見藕如船
談既縱橫默亦宜冥冥秋氣隔垂恩一身小疾閒方覺萬事先
機靜始知地僻塵沙終易埽樹高雨露亦多私他年走馬應官
去記取焚香坐隱時

秋懷

如此紅塵裏秋聲不可聽晴光仍爛漫生氣奈飄零得意花如
醉無言石自醒長安黃葉滿幾樹是冬青

聖駕東巡

盛京祇謁

祖陵禮成恭紀

擬古樂府十章
謹序

臣伏見

皇帝陛下宅位十載參天貳地握符闡珍觀

列聖之耿光造億禩之樂闡旁作穆穆旦明不寐率

祖尊

親之烈盛憲章稽古之政脩勝殘去殺之化成懷保綏靖之惠

浹厥濡仁涵義者八紘沈潛四澥濯沐殊鄰疏族貢珍

偕來

皇帝迺念惟

祖宗肇邦受命佑啓我家用能累熙洽承顯懿蹀躞軒庖之場

欲吐姚姒之響思有以崇

德報

功

推恩錫類上荅

列祖在天陟降左右之眷下省臣民政俗律度量衡之同維秋

七月

時邁於東展事

三陵纘舊服也

宸儀邃穆愛懋咸致洞洞乎屬屬乎禮備樂舉清寧象昭還蒞

陪畿班朝賜酺

達孝所暨薦禧畢從卓哉煌煌

繼述之德跨轡亘古至於所過升柴肸蠁蠲逋減租懷柔百神

誠和億姓所以運化權垂軌物篤祐承慶經綸萬樞者

尙數十事雖雅歌生民頌奏清廟曾何足方喻

盛典對敷

闕休顧臣軫薄遭遇

微禮仰睹

聖上淵冲默運於兩京山川城郭以及臣民庶物

珥節諮覽低徊不忍去默契

累世開疆拓土方正肇域之駿烈追懷

前寧譽髦思皇惠懋救寧之大勳卽事

搞吟往復諄諭以式

明訓以迪丕丕基臣誠不自揆輒欲覃精涸思宣昭

鴻業竊稽古樂府所載有重來上陵二曲藻被金石爲漢上陵

食舉樂府夫炎劉已事德不稱禮而相如子雲孟堅之

徒猶遠希猗那濬哲思文之什以馳騫往牒震曜繇祀

矧臣恭逢

聖哲聖聖之私等於蟲鳴階砌不能自休謹采古樂府譜調有
合者十章仍其舊目著爲新聲未敢謂發揚

庠光傳示無極竊附箴工之末謬續康衢之謠庶令傭孺輟童
諷詠流播冀有述於萬一云爾謹再拜稽首以獻

初秋撰辰

發軔幾旬順乾行循彛典也當練時日

練時日開瑤闔霽雲麗羲輪黃

駕雕軫六驢駛揚金髮拖玉環蔭華蓋建太常風清甸澍灑疆
招搖指析木鄉大瀛絡高山防衢尊設豐年穰金根車

豫且康

駕至興京朝鮮遣使表請

起居

德威遐暘文軌大同也當應聖期

應

聖期六服至樹領吹蠶東國使微臣表請

陛下萬萬歲鼎大可觴永錫類

皇帝曰咨汝東藩世脩汝職永勿譖轉桑煜爚

光被新鯨波滌蕩

恩無垠沐日浴月瞻

聖人

三陵展禮備物升馨隆報本光

孝治也當絜誠

孝孫絜誠闕宮血兮於皇

列祖詒謀翼兮瞻仰

永陵啓運蒼蒼肇基王迹幽居允荒瞻仰
福陵天柱岩粵天作高山岐陽式廓瞻仰

昭陵隆業龍從此維與宅豐壇攸同

孝孫洫止既匡既敕有穆其容有愴其色於萬斯年瞻依何極
列聖造邦

謨烈懿爍川原勝迹

諮覽靡遺溯

開基永

敬承也當聖人出

闕門潭

聖人出薩爾滸

王者烈松山杏山風雲屯十三劼甲照耀東海瞰小白怒奮大

白如追奔思

王業

王業殊艱難守成永固苞桑安神榆之樹奕葉真龍蟠

兩京風俗之美德產之富甲於四解

鑾輿循覽采幽風圖無逸也當時邕

民熙熙時邕邕白山之西凌河東京闕相望冠蓋從何以禦寒
貂鼠襦何以飾屨烏拉魚五楹之棧徑寸珠天珍地寶無時無
帝曰咨汝民念乃祖父力呼蘭以爲炊霞縹以供織

先皇紱衣革鞜始開國予與爾民共寶此儉德

御盛京 崇政殿班朝錫宴大和會也當嘉胙樂

錫嘉胙班朝儀羣臣奉爵上壽

聖人南面而受之十亭前二木下舞角觝奏需雅羽琤大賚光

院錢騎將車湊窮芳鮮璆縣琚朱鏗以宣在鎬愷樂頌
萬年

望祀神山北鎮東溟咸秩懷柔百神也當帝臨

不咸高山天所作醫閭渤澥左右相環絡脈延龍氣蜿螭而磅
礪神京拱衛億萬年長男鎮位扶坤乾青牛白馬沃醑虔旃
蒙歲

帝親臨溟不波山爲霖百神趨咸受職視公侯廟翼翼

乘輿親奠功臣墓其餘懿親勳戚分遣祠官往醑勸有功也當

象功舞

名世際會風雲開英姿颯爽酣戰來精靈返箕尾毛髮圖雲臺
炳蕭艾酌醪醴崇有功

詔佑啓佑啓爾後人象賢如先臣銀潢下注作霖雨長白世世

生甫申 國家之寶惟仁親

推恩行慶

澤溥岐豐錫類也當昭慶

湛露降昭慶長混同暈綠同汪洋黃童白叟頂熱香

帝之來兮滋蕃昌 龍旂返兮雲飛揚懷吾民兮覲日光咨爾

父老兮殷予望予永眷兮維梓與桑珊鉤礪甕蔀祿粉榆鄉

鑾迴告蕝格

廟受朝

奏天儀慶禮成也當宣受命

鏗鯨魚發華鐘

帝車迴杓臨紫宮卿雲紉繅曦瞳矐秉鬯

太廟格

祖宗開明堂羣瑞輯從官

賜爵一級所過州郡蠲貸助不給太史簪筆書

皇帝十載秋七月逮於十月之吉

大禮告備

孝治允洽

聖繼

聖哉神人慶哉

宣受命哉

又恭紀七律三十首

王迹開基肇大東

文孫堂構邁家風十年

宵旰重熙集四海車書累譯通

清廟已看隆

孝治

丹陵猶復厪

宸衷

一人纔動松楸感早合歡心萬國同

報本常懷祀肅雖每於霜露動

天容燦盛隔歲占邵稷穰桷頻年仰景松多士習儀鵷鷺序祠

官備物植犧供瑤緘典禮精誠甚

丹詔前期戒秩宗

天作陪京勢駿麗九秋雲物盼鸞幢虞巡八月頒新令周

室三分溯舊邦幽館造舟歡已動越裳遵軌氣先降山川喜奉

宸遊近瑞色晴開疊綠江

神畿

輦道儘倭遲飾路填街俗早熙望

幸盡歌

王豫諺赴功爭詠子來詩桑乾効順知河伯榆塞清塵得雨師
大吏視塗頻入告彩虹影裏竚鸞旗

奉先神殿啓瑤扉

鑾馭親辭寶篆翻六合有秋材貢集八方無事羽書稀岐豐作
邑

貽謀遠河洛巡行

踵武魏鳴玉

慈宮琬仗列依然出告向

庭闈

禁鐘鳴

發軔初秋烟五色捧

宸輿 龍池寂靜無張樂 豹尾森嚴少後車 震肅千班鏘劍

佩康莊九達擁 麾旗

皇心此去先齋被湯網周收一例除

黃麾紫蓋引前驅 衛士持輪夾道趨 碣石一峯朝

御幄灤河雙鯉獻 天厨

披章乙夜還勤政

省斂丁男盡減租 龍塞秋光雖絕勝

聖情原不爲遊娛

榆關紫氣挂晴霓 爽金飈入馬蹄 海亦來朝三島近 山如迎

駕萬峯低 日華結彩成

王字草木生輝待

御題一路

天顏先有喜古風淳樸見羣黎

興京雲樹鬱蔥佳

翠罕華旌駐玉階外國使傳朝請表陪都官遞職名牌地盤

河綠重城繞天削峯藍萬笏排

陟嶽

降原真氣在

觀風皇澗愜

宸懷

啓運龍從

饗殿開翠藹丹桷煥枚枚百靈呵護徵祥發

四祖憑依福祿來樹獻珍符聯若木山封顯號接中台 龍旂

此日親承祀瑞鼎光昭徧九垓

巍哉天柱接穹旻

閼殿森嚴衛百神遙自渾河鍾

聖哲遠過白水起真人九邊勢拓周京大

一旅師遷邾鼎新

威德

武功隆報饗

福陵錫福永千春

文皇駿烈邁周文史頌

重華繼

放勳勅甲臨關籌

睿畧威弧出塞蕩
氛秋風石馬開
麟用曉日

山龍散麝芬

拜瑞躬親松草茂
仰瞻隆業瑞氤氲

大饗重開

寢殿門馨香嘉薦
奉瑤樽盛朝禮樂
唐虞上

原廟衣冠頊髻尊
周頌一篇純嘏祝
堯廚三日大酺恩
鉤鈐

織女星同朗六幕
羣歌

有道孫

宗臣

開國際艱難圖寫
雲臺奕禩看褒鄂
至今毛髮動伊周
當日股肱殫酌勳
鐘鼎酬橫草配祀
丞嘗薦紫蘭封域
更勞親賜奠一時
感激徧千官

極天長白渺躋攀柴望

精誠祭告頒虎踞龍蟠諸嶽小乾維坤絡兩京環神漿曉薦

金莖外仙霧秋開碧漢間億載

皇基磐石固周岐應愧頌高山

崢嶸雉堞靄祥烟

時邁周京駐澗瀍薩爾許推

開統大鄂多里紀

發祥先千春瓜瓞縣陶穴萬井桑麻慶甫田

親御鳳凰樓眺望地靈精彩煥山川

清寧宮殿鬱嵒巖銀棟珠題燦斗杓蒿桂豐隆思

大武松雲光被泐

神堯中天雙闕規模迴東海三關控制遙

尊履蒸蒸承

燕翼金甌永固萬靈朝

漆沮風土輦桑苞法喇威呼徧近郊
擬獻施函原好禮符占帕
格當觀爻額林作几陳
行幄賽斐調羹奉
御庖午夜霞綳

同列炬

天章勅取豁山抄

橋山餘慕企
神臯陳設天球共赤刀

舜玉延禧瞻鳳采

軒弧變伐緬龍韜紹聞默念

求衣切睹物彌欽

作室勞載撫杯棬羹器重

豐功

儉德仰天高

崇政宏開寶殿我祥烟繚繞護
鑾坡十亭待漏傳青瑣五部

趨朝聽玉珂喜觀

龍顏霄漢近

恩承

鳳詔露華多神絃奏罷生民頌八伯還賡喜起歌

舊畿六日駐鸞車鵠立藍袍迺

翠華東國聲詩追漢代西京鐘鼓邁周家帛頒
內府雲霞燦

額廣園池

雨露加豐芑由來

文教盛環林爭放筆端花

皤皤黃髮覲

龍光冠鹿扶鳩拜道旁曾見

高皇臨沛邑又瞻

車駕幸南陽三多競效康衢獻二算均頒御府藏柏露芝英

同壽宇不緣神爵賜嘉祥

顯相雖雖告

慶成盛開嘉宴錫公卿鳧涇爭受

來寧福魚藻方歡

在鎬情象服千官承饜飫交間百戲備昇平陋他漢帝歌風

日草草新豐置舊京

禾稼如雲

玉軼經烹葵剝棗俗盈寧千箱恰慶年豐屢百室還邀歲賦傳
豈有秋豪煩部屋頻施春澤徧郊坰隨行自有龍眠手好繪圖

風上

御屏

羽林頒賞荷頻仍
優渥恩波大小凌
防戍正嚴千里燧
酬勞寧惜百匳藤
士心倍奮貔貅勇

帝德猶懷犬馬能
手捧雪寒錢賜目
歡呼

萬歲徹

三陵

墨池晨露似珠流
行殿幾餘

寶翰留日月文章
輝九塞風雲歌嘯
叶三侯豐京刊勒
懸金鏡荒服傳抄
織錦韉不數漢家
才藻麗橫汾一曲
紀遨遊

錦闌天仗列森森
轉蹕風光暘

穀林玉殿遙瞻三
輔迴

珠邱迴望五雲深
旌旗早慰羣僚眼

弓劒猶縈

至孝心踞捧香花關內外人人爭盼

六飛臨

北鎮醫閭斗極參北溟方位澤流覃非關封禪翔黃鵠特展

明禋

駐玉驂

穆駕不辭勤省覽

禹功寧爲逞幽探翕河柔嶽

天威震大地都教湛露函

皇都綵仗萬民瞻

受福歸來喜氣添露洗寒花迎
鳳蓋風梳秋柳拂
龍蟾雨

階預整朝儀肅

九廟重申祭告嚴正是授衣冬令節

溫綸挾纁徧窮簷

禮成宣室紀瑤緘

恩詔輝煌舞鳳銜

萬壽無疆寰宇頌

一人有慶兆民誠祭脩畢陌前型紹朝就豐宮古憲監歌罷白

磨歌赤鴈

小臣

珥筆和

韶咸

天真閣集卷十七終

常熟劉光德局鐫

天真閣集卷十八

詩十八

昭文 孫原湘 子瀟

上大學士朱石君師四十韻

今代論賢相如公乃足當遭逢真

聖主簡擢自

先皇夙仰宗工望欣乘至道昌風雲從岳牧日月婉虞唐凶德
誅禱机良臣應鳳凰鼎茵隆四輔台袞寵三梁抗議過張禹私
憂薄孔光蘇平扶氣運忠鯁植綱常治亦參黃老儒寧襲馬匡
鴻飛殫翼弼牛喘察陰陽東閣絲綸美西清翰墨香元功勤吐
握餘事近文章杞梓 金墀貢珊瑚鐵網張才慙萌弱中筆勉
繼長楊穎脫雖囊出名探夾袋藏揭曉後公率領午門謝
恩獨於衆中呼湘曰此江南
知名淵原由宿世顧睎異班行數歲時隨先君需次京師儼公
旁屋而居公與先君交甚密謁

見詢及家世驚曰 卻憶隨親騎相攜入 帝鄉問奇楊子宅買

此吾故人子也

夏晉公莊竊喜高軒過常窺短几旁韻令通轉注字教辨凡將
書素沈雙鯉音塵易甘霜裏戶勞績著把臂故人亡葛帔寒誰
卹銀袍志幸償少曾居廡下今果列門牆曉履停深雪晨餐到
後堂侯芭堪易授陸氏諒莊荒賦荷誇鸚鵡裘蒙解鵲鵲腹辭
懲險怪僞體禁俳倡敢道傳衣鉢頻邀資酒觴奪標憐小宋撫
座惜封郎素節驚蟾闕青霄盼雁翔思歸知嚙指準假慰離腸
公時掌翰林院蒨璣重中語瓜期豫戒忘臨行猶目送下拜益神傷願
保瓊龍養榮承霍鹿祥甘調伊尹饌巧補仲山裳靈壽先生杖
神芝卻老方南還依定省北夢戀唐颺時雨均霑被春風切奉
揚師恩殊未報况是 國恩長

鼃錯

不作一身計惟知七國謀既能爲賈誼何弗薦條侯臣隙參商
起君心日月伴寧容屏人語喋喋殿西頭

書范忠貞畫壁詩卷後

藏瞿菊亭
孝廉家

噴不盡侍中血嚼不爛常山舌耿耿獄中字不滅齧不碎張巡
齒斫不斷霽雲指日日淋漓詩滿紙逆藩兵疆督臣弱不能縛
虎爲虎縛三年黑土目無見一片粉牆心可託豎儒目論喜掉
脣病公不能先制人公亦自稱誤國臣報國惟此無能身公豈
無能實無力人不識公

帝自識兩字忠貞日月光百篇幽憤冰霜色宋有正氣歌明有
浩氣吟三人一氣詩一音三詩鼎足三仁心千年煤炭作寶光
上浮碧血風吹香瞿翁得之西廡市破爛不完十一紙裝成行
篋誇示人寶之願同生與死翁平前身得非武夷子

菊亭譜曲圖

眼前餘子徒碌碌獨背西風自製曲六十四歲老孝廉三十八
年舊科目不能玉堂作神仙不得銅符受民牧青鞵日踏輦紅
塵往往逢場戲竿木淺斟低唱宋子京鐵板銅琵琶蘇玉局元百
種外種別傳湯四夢間夢可續人言折齒謝生歌我道吞聲阮
郎哭賣賦年來充橐金煥老公然置燕玉菊亭新置簾但令紅襖畫
烏絲焉用官袍製章服吹簫自付雪兒歌按拍還教雷氏讀織
手玲瓏記紅豆老眼摩挲對黃菊多少金龜賦蚤朝輪與先生
此清福

假旋示都門諸君子

冠蓋如星簇畫輪春明門外送歸人還鄉非敢誇新貴籌國
先應讓大臣回首五雲誠戀闕關心九日倍思親

君恩豈但文章報去住風前各檢身

手脫朝衫散紫烟蒹鱸詩思已飄然儘教靈運先成佛宵學淮南浪鑄仙丹竈白雲營子舍青山紅樹等歸船一繩下水秋鴻影還望長安在日邊

德州謁淵如前輩兄

鬪酒看花昔夢清高齋重見鬢絲明校書東觀論前後索句西堂愧弟兄金石搜殘秦古字風雲化出魯諸生何時手擷湖蒹紫秋草祠堂拜長卿

時方謀建孫子祠于虎阜

題平叔詞稿兼寄秦秋南茂才

鴻儀

同破遙空雁影雙同歸秋興木蘭艤一池春草慚靈運七寶樓臺讓夢窗巢豔海棠燒短燭徑被霜菊瀉深缸微雲山抹秦家句苦對龍山憶皖江

慧山下別平叔

明月已如此孤帆吾欲開萬年終似電百里況同雷秋草叢殘
卷晴湖潏潏杯九龍山九曲九日九腸迴

哭從孫天長

吾兄垂六十僅有此孫枝宛轉依衰祖聰明勝衆兒同眠知冷
煥病目賴扶持今日思量著西河淚若絲

汝父年三十鼎然一病身慰情惟孺子課讀共閨人視疾五常
到呼翁爾最親登樓今寂寞不忍坐逡巡

記得公車發門前送我行牽衣詢去路屈指算歸程兩月睽南
北千秋判死生長安看花日爲汝淚縱橫

十七年前事傷心此不殊無端雙鳳折幾使兩瞳枯玉樹遭風
雨金環寓畫圖今看此遺挂舊恨觸童烏

讀史

默坐焚香對古人不知誰是我前身世皆欲殺才方大俗骨相
憐品未真寧使抑揄遭路鬼漫將幽滯仰錢神寂寥自有千秋
事莫管桃花門好春

野泛同毛壽君徘徊竹橋丈墓下時壽君歸自粵東寄
居僧舍

身到鄉關百事閒遠尋秋思渺瀰間黃雲滿眼豐年至白雪盈
頭老友還有淚不禁霑宿草無家只好住空山與君且訂寒鷗
約來往蘆花水一灣

飲集芙蓉室

故人知我遠歸來悶閣清嚴次第開差喜狎鷗盟水渚漫誇倦
窪下蓬萊消磨文酒多閒日主長湖山未易才如此清歡宜盡

醉燭花挑落重徘徊

秋窗讀易

秋氣尋空來萬葉震疎響乾坤肅然清至道與秋朗非秋感秋
心元微析冥想畫破天鴻濛不識太虛象涼颼啓前窗古桂慙
幽賞易理在於斯吾神與之往

壽君以明鏡珠胎硯見貽報之以詩

珠江采采雙明月貽我清輝出繡囊祇覺形容增老大未忘結
習在文章千秋治術須金鑑一代成書在玉堂珍重故人期勉
意研磨心力敢拋荒

畫梅寄蔣伯生少尹

因培

黃河北去雪漫漫絕世才人老一官寫與銅坑一枝雪春情如
在故鄉看

冰豆腐

瓊漿本似玉壺澄凍極誰知反不凝鬱結心思生萬竅疏通肌
理透千層嚼來碎雪原無滓浸入溫泉尚有稜配我腐儒粗糲
飯頭銜剛稱一條冰

水煙筒

龍牙新製小金筒二氣潛舍一竅通欲縱火攻曹壁下先教水
灌晉城中氤氲別擅相思味呼吸方知既濟功終日隨身誰與
稱賣珠雛婢埽花僮

蘭皋賀余登第詩有名高偏不占龍頭之句次韻奉答

三首

看花歸日馬應愁載得郎君第二流合讓埽眉人吐氣高盤龍
鬚立鰲頭

瀛洲也算列仙家煉到黃金事尙賒手折杏花成一笑今生脩不到梅花

我是過江溫太真蓬萊腳下儘容身勸君莫羨芙蓉鏡萬事難爲第一人

馬詩

志士老牖下名駒在空林共惜百年短徒有萬里心酸風折銅骨高桁排銀砧傳聞果下騎踏煙大幕陰

對雪漫興

寒氣忽收元氣盡千家萬瓦白茫茫直疑富媼開銀汞頓使齊民坐玉堂照眼縱添花炫耀轉頭已化水汪洋老梅自挺冰霜骨不藉天公爲助妝

觀小女若霞寫梅

冥冥紅雪月黃昏爲護狂香早閉門開到十分全盛處女兒簾底已銷魂

張夢廬太守

鳳枝

萬里一歸人圖

邊庭報奇事一夜烏頭白太守氣如虹萬里如咫尺歸來兩鬢風颼颼韉中猶插雙吳鉤兒童索取龍荒月笑指天山雪滿頭

梁溪張文恪公壽芝五葉圖爲夢廬賦

尙書奕葉長清門親見桐孫又抱孫四皓鬚眉邀帝眷二疏骸骨重

君恩喜從圖畫看前輩妙有文章式後昆第二泉邊芝五色勝如仙李大蟠根

合浦眞珠曲

冉貞秀貴筑人適南籠張太守靈顏姝瑩父母以爲

奇貨構端索擾太守遣之貞剪髮自誓貴陽守徐按
其事徐夫人召入察其志堅諷張復納焉無何值狎
苗蠹動太守被逮且不測復遣貞貞曰立黔江干伺
閒與太守決太守謫戍伊江以貞寄其戚榮陽署越
歲致書榮陽君偶不及貞貞本思憶成病至是銜恨
遂雉經卒貞之復歸張也洪穉存學使爲賦合浦還
珠詩余更名真珠曲世有采風者可以觀矣

盤江圓渦清照骨老仙踏龍採明月鼉鼉噓海市陰神娥抱
玉寒波心綠雲墮地釵股折湘竹啼紅字不滅風吹破鏡飛上
天手綰虹霓作鸞結蟻螻擾亂春空雲雷霆下擊元真君芙蓉
漂流繫萍梗貝宮自弄金環冷洞庭奇樹春無聲迸落紅珠散
秋影玉蟾夜滴海水乾煙蘭露葉啼朝寒真珠小孃返青廓潛

英不動輕紗幙

養氣歌

前古後古閒忽然中有我我生天地中究作何事可日華在東方扶桑赤如火我欲往從之氣力苦相左大海何茫茫紅蓮作單舸荷葉以爲帆荷莖以爲枕不敢相撐持隨流任顛簸黑風鼉背來吹我羅刹墮吁嗟下民溺賴我拯其禍如何自浮沈兩腳踏未妥萬事在眼前雙肩不能荷昂然七尺軀眇若一蟲裸許身稷卨事大氣足包裹養之若養苗致力戒偷惰一息不分散塵累空細瑣放之六合彌談笑了叢脞如劒韜其鋒如花喂其朵如珠含蚌胎如黃孕雞卵鍊此不死藥丹田結丹顆勿負蒼天心生我白日坐

疆國單闕

洪穉存前輩出示探梅銅坑西磧潭字韻詩戲和一首

兼訂上海桃花之約

平生不識西磧山梅花笑我居江南屢商驢券事不果花時風
雪關茅菴先生示我花下詠風吹滿紙香穠穠挑燈細讀發狂
叫逕欲呼取籃與籃繁花已落月尚在美人待我山之嵐青枝
綠葉可把玩勝如紙上畱空談燈花靜綠寒意緊詩覓已落支
公龕白雲前行導我足山徑曲折窮幽探千峯萬峯一色白香
雪塞破天蔚藍冰花箇箇不肯落破例開過三春三天雞一聲
窗上白依然布被如眠蠶起來復取詩痛讀如聽人說江瑤甘
悔不早拍洪厓肩徒然夢學師雄酣豈惟梅花脩不到脩到山
中蛺蝶猶癡貪山靈有意縱招我面目自對空枝慙中行不得
且其次一笑去訪桃花潭

贈陶學博丈

廷埤

五柳先生後其人必洒然弟兄天下士夫婦地行仙吾邑文章
業公家奕葉傳久知昌化德元重以太常賢貞靖踵武詞林後貞
題名蕊榜先嘗思馬湖勝一受泮宮甄出處希彭澤聲名埒鄭
虔鄉評推一鶚教澤被三鱣令子吾同歲脩文惜早年幸餘雛
鳳好又卜兩鴻鵠晚節彌貞固孫枝况秀妍曾靈光殿在長此
奉華顛

神仙樂

瓊樓夜半虹梯收海水滴酒星爲籌鵬絃弄春煥君骨天宮不
識人閒秋紅羅作書迓天姥襍髮踏煙通隱語鈿車碾玉雲無
聲薄霧壓花成細雨斫榆黃鹿吹濃香金烏不敢窺燭光鸞衾
抱月選春夢石扉瑤草驚繁霜

送言明府尙燁之官瓊山

去年李侯雲之廣州與君送別天橋之酒樓南望海中大明月
恨不身騎蛟蜃羅浮遊木縣素馨同一邱君今亦作南中侯手
綰銅符下天闕詩情已落琵琶洲瓊州古珠崖海外神仙處其
本是沈香其花是瓊樹其民淳且樸金銀委衢路使君往下車
蛟龍息煙霧男獻檳榔盤女獻女兒布明珠及璫瑁一一充租
賦使君教以絃歌聲甌粵之俗爲武城民不知使君家法本如
此但言使君爲政清去年李侯至海賊多如雲今年海氛滅海
珠迎使君使君奇福天下無乃祖百歲嬰兒膚乃翁七十頭未
皤使君獨奉慈親輿以孝治民民感孚明年六月南風長家書
只寄鮮荔香乃翁跽奉乃祖嘗報書還投海中魚努力愛民莫
寄書

在翰林西堂畫梅四幀暇日各系一詩

瘠枝無力臥彎環
絕似疏籬野水閒
記得玉堂清夢覺
郭熙屏上看春山

一官無味滯京華
火繖當空走電車
閒寫江南數枝雪
勝如觸熱到人家

日下鬱蒸逃不得
偶思梅萼頓清寒
無由手拂南窗雪
對著真身畫與看

惆悵尋春杜牧狂
歸來風落一林霜
枝頭梅子都零落
臘有娟娟畫裏香

洪穉存前輩過訪畱宿荒齋同遊虞山二首

一葉紅蓮白鷺迎
入門奇氣自縱橫
爭看絕域歸蘇武
久已名山待向平
鬢上雪花來朔漠
夢中鈴索憶西清
開尊共翦西窗

燭真箇詩成萬戶輕

木犀香裏去逃禪布韞青鞵一老仙筆健每題丹嶂滿身輕常在白雲先貪窮泉脈無人徑愛坐松陰不漏天笑語山靈須認得祁連嚙雪舊忠宣

哭九姪阿鴻

一門羣從十喜見汝暫親萬事難全盛無端少一人病來殊卒遽藥治太因循畢竟庸醫誤徒勞問鬼神

每來頻聽汝誦讀最聲清踴躍先呼伯聰明實勝兄泥人書倣格索母畫棋枰小閣愁重到經書滿几橫

汝兄萬里外昨日有書回道汝清姿勝知親笑口開重慈同一哭少弟竟先摧還報瞿唐信江天獨雁哀

玉雪童烏貌居然活卷中細看仍不似悲憶更無窮展側呼難

下精寃夢可通汝耶纔四十努力盼非熊

哭怡雲姪

文桂

猶子偏憐汝會居弟子行有聲稱族黨無命入膠庠風雨心同契煙霞事共商竹林相賞意豈獨在文章

近歲猶耽學從予授說文丹黃看竝下點畫喜麤分橐筆從爰禮停車問子雲縱橫遺墨在空鎖一廚芸

我宦京華日書來報病深兩雛同折損一豎苦頻侵疾痛翻求死蕭條更慘心數行思子淚伏枕尙哀吟

久病終無命支離冀暫延尙扶孱骨起強慰老親前有女將書付無兒望弟賢臨終悲咽語繞榻共漣然

正是花生日偏逢命絕辰園林紅似淚泉路黑無春或竟游三島何從問九旻年年桃杏節爲汝一酸辛

汝婦悲思甚生綃託畫工夢猶期白首神不轉青瞳一見緣真
斷重泉穴許同手調薑與橘嗚咽奠秋風

仲春望日偕內子道華爲武林之遊舟中偶成

偶譚西子湖頭月便喚東風渡口船春水勸人宜速去桃花與
我有前緣金箱五嶽須閒日畫舫全家卽散仙大好烟波隨處
泊白鷗一一酒尊前

鶯脰湖

十年不過畫舫橋橋畔垂楊似手招鷗鳥白憐春水潄桃花紅
受夕陽燒喜溫前夢途猶熟貪和新詩日易消笑倚閨人同瘦
影自憐仙骨愧文簫

陳範川同年

鴻城瀛洲歸娶圖

築玉人深種玉緣玉堂歸省撒金蓮一囊分得芸香俸便抵黃

姑下聘錢

蓬山遲報海雞籌八尺香衾擁麝篝賦慣早朝心事在合歡牀
上夢瀛洲

照映湖山蜀襖袍兩高峯對鏡臺高脩完青史脩得史忙殺郎
君五色豪

項秋子

壩

招飲卽席呈穀人前輩並示同座諸君

碧桃花下鬥飛觴春氣濃熏薺麥香北斗七星團一座東風三
月醉千場古歡恰許新歡續前輩能容後輩狂忍說明朝挂帆
去閒庭且共立斜陽

范鐵琴秀才

來鳳

五嶼讀書圖

坐擁書城自閉關娜嬛祕笈手親刪中川孤嶼如萍小抵得東
南宛委山

上巳日過錢梅溪草堂脩禊

春帆冥冥細雨飛落花滿船香溼衣竹搖青烟茅屋靜主人候
我開雙扉開門正對苑山碧山晉主人來勸客江鄉風物正美
好櫻珠墮紅筍芽白去年同醉長安陌陶然亭西水一尺梧門
先生折簡邀君墊角巾我著屐今年卻聽江南雨回首燕臺莫
雲隔清尊到手且復乾桃花笑人酒腸窄明年知復在何處轉
眼新歡又陳迹願君自酌杯中醺興酣爲我書蘭亭君邀我作
延之詩我索君仿王羲之墨花縱橫筆花舞君書我詩各千古

毛壽君歸自粵東索題菊尊清話圖

乾隆乙卯君也粵時方薰所作贈行

卷

話別當年酒一杯送君遠上越王臺杜陵貧賤長爲客庾信文
章老費才舊雨題詩誰健在

卷中園公竹橋雨前輩俱歸道山

秋風彈鋏又歸

來不堪把卷重溫讀且對黃花笑口開

歸棲竟似失巢禽老寄禪房落葉深

時君寓居僧舍

陶令已無三徑在

駱丞猶耐九秋尋花田烟月頻年夢蓮社鐘魚此夜心卻喜尊
前詩筆健茱萸重爲白頭簪

秋興

聞道西師趣辦裝桓桓虎旅出咸陽關中萬騎若雲集天上一
星如帚長米賊尙傳逃蟻穴水仙誰與折鼉梁獨憂

聖主宵衣切丙夜軍書滿

御牀

東南水旱已頻仍螟螣秋來又滿塍鄉戶淚乾難望穫縣官心
急待催徵大家盡作居奇想中市新聞米價騰偏是海壩多乞

糴官符朱印總堪憑

海盜告糴多持官文書藉稱兵米

和小倉山房集中詠物九首

鏡

妝臺一笑睹風神
身外誰知更有身
金鑑能包天下事
玉顏難鑄此中春
心頭自覺常懸汝
背面從來不見人
那得秦宮舊明月
盡將肝膽向君陳

簾

宛地湘波蕩欲開
垂垂銀押恣低徊
儘憑月影花香入
未許遊絲落絮來
小節似多疎漏處
全身自有卷舒才
金堂內外分明甚
韓掾偷窺莫浪猜

牀

溫柔鄉與黑甜鄉
只在逍遙此一方
八座起居終要息
六時勞頓可無償
也如夏屋入頻換
曾得春風夢幾場
爲喜合歡名字

好紅鐙纔上便思量

鐙

雙雙珠蕊結銅荷喜報來朝定不訛萬事求難暗中得一生功
補日閒多光分貧女當窗織燄助豪家徹夜歌我願天風盡吹
滅救他人世衆飛蛾

扇

冷面偏逢熱客場能教熱處轉清涼青天忽墮懷中月赤日疑
飛掌上霜儘有塵緣難障礙本無愧色莫遮防秋風未起身先
退篋裏君恩倍覺長

尺

銀寸紅牙粟細排黃鍾玉律製容臺短長不用言爭論方正能
爲物主裁容易算完天上度斷難量準世閒才煩君鎮定閒書

卷莫任斜風亂揭開

杖

空山何處去尋詩折取紅藤瘳一枝直上漫誇惟我健臨危始
悔用君遲驚心漸覺孤行怯得力多應老去知誰似頑仙偏偏
彊生來從不要扶持

帳

珠幃瑟瑟辟塵清涼月來窺薄有情內裏看人原了徹外邊聽
語欠分明四圍能禁飛蟲入一夜難防化蝶行到此身心須放
下黃昏時候玉鉤聲

香

絲絲清氣向空盤不是心清領畧難透出性靈隨物染吐將委
曲與人看衣來隔院風先送花在隣家蝶豈瞞身入箇中翻未

覺祇緣滿室盡幽蘭

張雙南茂才

在錄

母夫人鳴軒課讀圖

淒淒復淒淒紙上悲風咽屋後脩竹林昔時賢母節門前楓樹
枝今日孤子血是母與是子皆我所心折子名張在鎔積學爲
人師母氏太原王教養兼嚴慈寡年三十五歿逾五十時格例
不得旌孤子涕漣漣手捧此圖繪徧乞人題詩匪重人題詩母
節世未知昔我初識君各梳雙髻了君居與我居祇隔一牆花
我甫七八齡逃學過君家君家阿母賢啖我棗與瓜繙弄所讀
書搖曳所紡車夜分鐙火下覓紙爭塗雅歸乘樹陰月城頭鼓
三搗我母怒我出云過張子家張家有賢母啖我棗與瓜其子
苦讀書其母勤紡車聞言母心喜笞責不忍加謂此賢母子過
從不汝瑕忽忽四十年各非故園宅我已雙眼花君亦頭半白

展圖令我喜如過君老屋如聞紡車聲書聲與相續掩圖令我
悲如還我舊廬不聞我母聲問我頃所如君思君母啼我念我
親泣兩人淚斑斑千秋此圖溼

書祝子遺書後

明祝淵字開美海寧人崇禎癸酉舉人劉宗周以劾
周延儒下獄淵上書求之逮治拷掠幾殆既而延儒
敗流寇逼京師有詔赦出而城已陷會吳麟徵殉節
死淵爲具斂護其喪以歸時馬士英亂政擬具疏劾
之未及上而南都破迺亟葬其母自經死事見明史
劉宗周傳書大半與宗周講學之語及奏疏詩文共

四卷

唱罷春鐙玉殿塵浙西無地著遺民上書未了陳東志報國終

捐正節身馬鬣成時兒目瞑龍鬚攀處士心伸書生何與興亡
事孔範王瑳盡老臣

當年緹騎逮倉黃詔獄沈沈繫范滂貫械不辭因李固收尸恰
許作楊匡叢山祠閉空薇蕨西直門開入虎狼地下忠冤若相
見一編心史語滄桑

梁星子秀才台陵茗精舍讀書圖

生不能如搨管作屋斛律金一字不識千人欽又不能如堂堂
崔協沒字碑朝廷交推宰相爲不如還復讀我書苦無松下三
閒廬安得結茅湖上山萬梅花擁將書攤前年艤舟葛嶺下謾
謾風吹讀書者萬卷曾窺李謚藏一椽擬向梁鴻假湖山一角
朝飛來展卷令我心顏開得非佛奴板牀隨樹陰抑爲任家茅
庵依密林世閒此樂不易得十笏地值千黃金古松蟠鬱老枝

大正集卷十
十五
怒纓絡紛垂赤雲護天風卷起蒼龍吟勸人及早凌霄去我思
攬身入畫圖手攜漢書一壺盧與君痛讀相歌呼免人喚作詵
癡符五千卷書讀未熟慎莫輕入崔嵬屋

小霞仿黃子久畫

不識桐廬七里灘胸中寫出富春山
梨雲一覺游仙夢身到元朝至正閒

擬李太白鞠歌行

春風吹蘭碧如草顏色不如桃李好
隨侯明月墮泥沙燕人抱石爲珍寶
青琴上絃不敢彈空房趙女蛾眉老
相如因狗監詞賦方豪雄衛青非子夫
焉能脫樊籠一朝攀龍見明主噓氣如
虹從如雨誰識當時馬廐中曳裾自埽
侯門土西施天下色含笑入吳宮珠簾
映朝雪光豔驚瞳眈當時若耶溪照水
徒自憐

同時浣紗女黛綠方爭妍周公吐哺四海欽大人虎變潛深林
吟成梁父今誰聽綠水悠悠知我心

明周玉巖先生杏花書屋圖

公名廣太倉人爲御史上疏諫武宗忤錢寧欲寘之
死僅而得免謫懷遠驛丞嘗夢居一室室旁杏花爛
漫諸子讀書聲琅然嘉靖初起廢官至刑部侍郎卒
公子孺允葺公所居堂曰杏花書屋以志公夢歸震
川爲之記裔孫某從故居遷霍市齋前適有杏花一
株復得董文敏所書杏花軒額拓以顏之作圖徵詩
以繹無念爾祖之義云

豹房天子匿倖臣獬廌一觸羣犬瞋鉏麗伺途刺不得嗔囉行
乞湘江濱洞庭木落秋水新幽蘭顙顙蒙荆榛鐵心灰滅故園

想夢中卻夢江南春杏花古爲及第花曲江春夢明如霞如公
湘纍謫長沙此花何爲入夢耶震川作記解公意公豈縈情在
科第未了平生報國心宣力猶思後人譬如夢構屋公志完夢
中花與兒孫看登堂便思公愛國杏花直作離騷蘭卽今霍市
東頭杏歲歲花開爛如錦不是先生手植花猶是先生夢時景
前花後花同跼鄂前人清風後人學舊額聊將董書補我詩還
繼歸文作

結交行

勿頸爲心交奮臂遂相賊耳實先負餘餘也量何窄邯離鉅鹿
圍兩軍若虎翼餘兵僅數萬肉懼委虎食先嘗五千人歷澤自
輕敵餘如赴俱死於耳竟何益是時諸侯軍觀望不敢擊子敖
從代來瑟縮旁餘壁重瞳垓下戰餘寧獨無力奈何望臣深寬

子專友責一尸橫泚水一身王趙國成敗各有天天豈論曲直
或惜井陘口不聽廣武策果然斬耳頭終亦遭漢瓦莫如解印
綬漁獵終河澤竟卻三縣封足愧千金值

幽秀一章戲補詩品

萬象回惑素心自閒無人與期獨往空山老樹挺秀春情未刪
冥鴻響寂碧雲孤還太華在眼芙蓉可攀游精八極不知人閒
無錫華氏貞節卷

節婦陳氏元都功德使司都事華子舉之配年二十
八而寡撫子幼武成立至正閒予旌幼武嘗作貞節
堂春草軒以奉母其家乞諸名流爲詩文以張之前
明有王時彥作記文徵明徐昭法補圖皆名筆也文
畫旋失去裔孫某屬朱右泉補之復索題詠

華君示我貞節卷令我淚落心茫然至正迄今六百禩滄桑已
變陵谷遷共姜節義膾人口文章力大天無權文章亦易爲雲
烟誰家世守金粉鮮後人之賢先代澤一母苦節開其先我亦
有賢母氏族同潁川十八矢黃鵠較此尤青年楹書教兒讀紡
績十指穿兒方釋褐衣母遽歸黃泉我有千尋木不能造貞節
堂一椽我有五色袍不能婆娑而舞白髮前惟當效此作圖卷
猶恐畫手不能寫出心貞堅安得王英作記文壁畫似此五百
年後長流傳

鳳麓讀書歌

武林梁文莊相國舊有別業在鳳皇山下賢孫弓子

祖勳

屬奚鐵生山人

岡

作鳳麓讀書圖述祖訓也

平生夢想西湖山突兀見此青螺鬟一窩冷翠構飛閣吟聲依

約蒼冥閒此閒曾築沙隄路高齋鈴索烟雲護花木平泉說贊
皇松筠洛水思裴度韋平世澤誇粉榆懸巖石倉多賜書北門
學士仙舟挈諸阮東都士人稱少疏阿咸頽頽人似壁挂腹撐
腸有書癖十年板牀爲減銳一卷蒲編不能釋排衙古石搖几
青奇峯十二森畫屏攤書正在碧松下松濤合吹風泠泠元超
撫石每涕零范喬執硯懷祖馨著書自紹姚察訓座右還奉僧
虔銘鐵生畫手今奚獎寫出林巒致疏爽連屋縹緗架石牀拂
簷蘿蔓侵書幌我亦耽書近欲癡鑿楹自願名山往徑須手探
玉筍巖與爾同扣靈威丈

七箴

昔程子作視聽言動四箴示人以制外養中之方者
至矣既錄以銘諸座右復擬喜怒哀懼愛惡欲七箴

張之于左非敢妄擬昔賢亦聊以自警云爾

喜箴

養心于和惟喜當春與物無忤惟喜近仁由勇聞過回樂處貧
聖聞絃歌莞爾見真彼來譽我或者庸人悅不以道勿假笑嘖
如樂有節必中其倫

怒箴

怒以行仁不仁胡怒赫赫雷行誠與物遇柰何血氣敗我常度
至人養性如火在樹心不氣役氣不心據橫逆之來惟我之故
哀箴

路見罪人潛焉出涕行道弗忍矧寡兄弟聖人節之情以禮制
滅性則傷死孝非計然而此言可語上智若夫下愚寧戚勿易
懼箴

詩亦有言無敢戲渝失足卽溺柰何馳驅在獨曰慎遇事曰萬
衆進我退衆伏我起無懼之懼憑之以理

愛箴

春蠶縛絲苦不可脫七情之中惟愛難割偏之卽溺博之卽仁
仁民愛物始乎親親燕私則偏理義則正古無至情但有至性
惡箴

人而無惡不仁之尤如以一器而聚薰蕕察之必精審之必固
勿任私嫌勿徇衆惡苟非大姦容之以度

欲箴

涓滴之漏弗塞則決一星之火弗滅則裂不見可欲主乎清淨
如一見之其欲彌盛君子不然克己以敬入乎物中不受物穿
食色性也而不謂性

讀書樂

我生不幸不生三代前
尼山教兒學不過四詩三百首
儀禮十七篇
武成只取二三策
學易要待半百年
憑爾載籍極淹博
能讀三墳五典九邱與八索
其實挂之不滿一牛角
當時便稱大博學
我從髮燥便讀書
讀之三十年有餘
愈讀愈多心如亂髮
不可梳
初讀十三經
一經百家注
次讀廿三史
別史更無數
其餘諸子雜家
天地名物詩文藝術
不可悉考據
朝廷大收四庫
開不能一一徧貯
芸香臺何況鯁生之腹
大如一壺盧焉能讀盡
鄴侯插架荀勗廚就令假我
彭祖之壽賦我顏淵之敏
讀至髮白更黑齒落更生
猶恐讀不盡
讀不盡愁復愁
就我目中所見已足充五乘
汗十牛所未見者羽陵委宛堆積如山
邱忽然大徹悟
抑復大快樂
吾生眼福不爲薄
古人嘔盡心血掇出

天地之祕鑰嚼爛舌根論定朝野之事畧供我冥思幽討細咀
嚼快吾意者吾踊躍拂吾意者吾笑噓如聚古人置我一室中
是非美惡由我恣評泊設使我生秦漢前焉得快讀荀楊劉董
之真詮馬鄭賈孔之疏箋屈宋韓柳之文章李杜白蘇之詩篇
何況花變種而益妍石滴溜而益穿後人之知創巧述更勝於
古所傳我思古之人應妬我富有授不必借伏生口寫不必煩
孫敬手部奚止乎甲乙丙丁課無間乎辰戌卯酉百萬之富用
可空四海之大走可窮惟有讀書之樂樂於上青天青天無人
走得到讀書何人讀得全讀不全樂更樂譬如登天登至半空
中日月星辰如可摸黃嬭在前長恩推後引我一層上一層不
知上到何時方住腳

秋林問墓行爲黃琴六茂才

廷鑑作

步出西郭門白楊蕭蕭無所見黃生尋秋日不厭黃生爾何爲
云有遷虞始祖墓不知埋沒何荒陲東崦孤墳三西崦孤墳四
草長過人土花紫捫遍殘碑沒黃字里胥來道旁問生何彷徨
蔣家墓西古祠堂依稀記得江夏黃入祠老屋半傾圯殘碑漫
滅字可擬誰與識者陶太史貞大書節婦及孝子因祠始識墓
肅拜溪毛陳子姓恐再迷作圖垂千春作圖匪示我苦心但願
人人問墓墓卽得世無荒冢埋秋林

哭太傅朱文正師

我朝兩朱公先後爲聖輔高安導其前大興若踵武今
皇在青宮公實侍籙俎及登政事堂宣力重肱股雖無袞職闕
親見仲山補要其啓沃功默運在心膺舜學務成昭堯學子州
父不聞二典中訐謏載何語公誠格于天公疏付諸炬公竟升

日星公心立殿廡

一鄉惜善人一國惜善士公善及天下天下惜公死自公直綸
扉鼎軸襄上理南溟息鯨鯢西賊靖蜂蠆文章如江河霑漑沒
涯涘仁義如稻粱饜飫遍遐邇十年相業成朝野方依倚奕
奕文昌宮一星墜箕尾

或言公學佛頗爲儒者病不知黃老術善用卽孔孟時方擾潢
池疲俗苦奔命公師蓋公言清靜民自定慈心召祥和澹欲抑
浮競借彼脩持云佐此寬大政上可媿蕭曹下亦匹魏邴柰何
一孔儒目論肆譏評一德致太平

天子獨神聖特命繼湯

唯州劉城諸鼎足諡文正

前詩祇陳公論而未及私誼再哭三首

九歲始識公我如輕儵公如龍四十爲弟子公如蒼松我桃李

坐公春風中我持寸莛公洪鐘別公秋雨裏公淚如潮我袍洗
公之弟子滿天下何獨拳拳一生者謂我如侯芭我不識奇字
謂我如邴原我不解經義作詩何益天下事公嗜我詩若嗜芟
爲位哭公詩當祭

八月十五沈沈雨冠蓋如雲謁公府公於衆中持我裾今日之
樂吾與汝揮手謝衆賓獨畱一生語我豈如戴崇公實過張禹
酌我中山醪啖我追復脯衣我盤雕袍贈我松枝麝知我有老
親令我歸作萊子舞約我明年秋亮月如盤此會補烏虜此會
何時纔得補我歸兩載公千古

公嘗勗我云子骨清且鯁文章亦如人不墮時俗境使子持文
衡慎勿取陽鱗之魚吞鉤迎使子持法星慎勿爲立仗之馬瘖
不鳴公之箴言猶在耳我銜親恤病不起雞骨支牀念灰矣烏

庠此生不出吾負公頭戴北斗悲秋風

屏風曲

霜鐘敲轉北斗柄一星斜隱秋河淨金鵝屏障圍巫峯沈香密
炷櫻桃紅玉壺碎擣梨花煩濃注湘波七情滿春融四體輕無
仙從君樂飲回青年紫簫吹落中天月楚雲牽夢銀濤窟

傾城曲

妝罷依然出閣遲天生愛好越矜持妍媸何事從人問自對菱
花看幾時

一舸鴟夷入五湖千秋第一美人圖若邪溪上如花女只是難
逢范大夫

徐節婦貞孝詩

雄龍雌鳳天西東素娥耐冷居瑤宮下妬塵寰老相守竝頭劈

破雙芙蓉延陵有女徐陵適橫被罡風拆鸞翼九原拌作死鴛
鴦俯仰其如死不得上有姑頭已白下有孤子猶赤殉義何如
守義難一身事育千心力或言徐家婦甘節非苦節其操雖如
霜其寒未如雪敬姜有論逸則淫自來溫飽移貞心膏粱身冰
蘖味井水靜無波爐灰死無氣如此堅貞良不易何必劈面截
耳與斷臂

天真閣集卷十八終

常熟劉光德局鐫